



Brčko,  
12. 3. 2020. godine

- Medijima

### Naredba o korona virusu

Na osnovu člana 16. i člana 17. Zakona o Vladi Brčko distrikta Bosne i Hercegovine („Službeni glasnik Brčko distrikta BiH“, broj: 22/18 – prečišćeni tekst, 49/18, 8/19, 10/19 i 32/19), a u skladu sa zaključcima sa trećeg nastavka 89. vanredne sjednice Vlade Brčko distrikta BiH održanog 12. 3. 2020. godine, gradonačelnik Brčko distrikta BiH i z d a j e

## N A R E D B U

### Član 1.

Nalaže se Odjeljenju za zdravstvo i ostale usluge da uz koordinaciju s nadležnim organima, institucijama i pravnim subjektima u Brčko distriktu BiH izvrši dezinfekciju objekata, kao i gradskog i prigradskog prevoza i taksi službe.

### Član 2.

- (1) Zabranjuju se javna okupljanja koja broje preko 100 lica.
- (2) Nalaže se šefu Odjeljenja za zdravstvo i ostale usluge da pripremi saopćenje za javnost u vezi s ponašanjem lica u zatvorenim prostorijama (restorani, kafići, diskoteke, apoteke, prodavnice, hoteli i sl.).
- (3) S ciljem zaštite zdravlja stanovništva odgoditi sve sastanke, tribine i okupljanja u zatvorenim prostorima.

### Član 3.

- (1) Zabranjuju se sve kulturne, zabavne, sportske i druge manifestacije.
- (2) Zabrana iz stava (1) ovog člana ne odnosi se na takmičenja koja se održavaju bez prisustva publike.
- (3) Zadužuje se šef Odjeljenja za privredni razvoj, sport i kulturu da se obrati sportskim savezima s preporukom da se odlože sva takmičenja u narednih 15 dana od dana izdavanja naredbe.

#### Član 4.

Nalaže se šefici Pododjeljenja za javno zdravstvo da uspostavi stalnu komunikaciju s Ministarstvom sigurnosti BiH, terenski centar Brčko – Služba za rad sa strancima, s ciljem razmjene informacija u vezi s boravkom stranih državljana na teritoriji Brčko distrikta BiH.

#### Član 5.

- (1) Nalaže se Pododjeljenju za javno zdravstvo da odmah osigura materijal od 1.000 (hiljadu) letaka s instrukcijom o ličnoj higijeni, 1.000 samoljepljivih letaka koji će biti postavljeni u toaletima organa javne uprave, institucija i javnih ustanova s instrukcijom o ispravnom pranju ruku, 500 plakata formata B2 sa informacijama u vezi s korona virusom (COVID-19) i kako se ponašati s ciljem zaštite zdravlja.
- (2) Za kontrolu ispunjenosti naloga iz stava (1) ovog člana zadužuje se Inspektorat Brčko distrikta BiH, odnosno sanitarna i zdravstvena inspekcija.

#### Član 6.

Nalaže se Odjeljenju za zdravstvo i ostale usluge – Pododjeljenju za javno zdravstvo da kontinuirano fizički vrše kontrolu samoizolacije lica za koja postoji rizik od zaraze korona virusom, te upoznavanja javnosti s kaznenim odredbama nepoštovanja zakonskih propisa koji regulišu oblast zdravstvene zaštite.

#### Član 7.

Nalaže se šefu Odjeljenja za zdravstvo i ostale usluge da u saradnji sa JZU „Zdravstveni centar Brčko“ Brčko distrikt BiH – Higijensko-epidemiološkom službom (HES) osigura dezinfekciona sredstva za potrebe javnih institucija, uz obavezu da edukuju zaposlene o načinu korištenja istih.

#### Član 8.

- (1) Nalaže se Inspektoratu Brčko distrikta BiH da pošalje obavještenje svim privrednim subjektima na teritoriji Brčko distrikta BiH da su dužni izvršiti dezinfekciju objekata i vozila.
- (2) Nalaže se Odjeljenju za zdravstvo i ostale usluge, Pododjeljenje za javno zdravstvo da sačini pisanu instrukciju o načinu upotrebe dezinfekcionih sredstava.

#### Član 9.

Nalaže se šefu Odjeljenja za javni registar da u toku dana ograniči i racionalizira broj stranaka u šalter salama, kako bi se spriječila izloženost i okupljanje većeg broja ljudi u skućenim prostorima.

#### Član 10.

Nalaže se šefu Odjeljenja za obrazovanje da pojača nadzor u vezi s kontinuiranom dezinfekcijom školskih objekata i obdaništa na području Brčko distrikta BiH.

#### Član 11.

Ovlašćuje se šef Odjeljenja za zdravstvo i ostale usluge da stupi u kontakt s predstavnicima vjerskih zajednica u Brčko distriktu BiH radi dogovora o načinu dezinfikovanja tih objekata.

Član 12.

Zadužuje se Sekretarijat Vlade – Sektor za informisanje da pruži tehničku, stručnu i drugu pomoć šefu Odjeljenja za zdravstvo i ostale usluge i šefu Inspektorata kod održavanja svakodnevnih konferencija za medije.

Član 13.

Za kontrolu provođenja ove naredbe zadužuju se Inspektorat Brčko distrikta BiH i Odjeljenje za zdravstvo i ostale usluge – Pododjeljenje za javno zdravstvo.

Član 14.

Ova naredba stupa na snagu danom donošenja, a objavit će se u „Službenom glasniku Brčko distrikta BiH“.